

Allannguutissatut siunnersuut

uunga

Uunga siunnersuut: Akileraaruserinermik ingerlatsineq pillugu Inatsisartut inatsisissaannut nr.xx, xx 2006-imeersumut siunnersuut

Aappassaaneerinissamut Naalakkersuisunit saqqummiunneqartoq.

§ 1-imut

1. § 13-imi *imm. 8* nutaatut ilanngunneqassaaq:

"*Imm. 8.* Akileraarutit, matumanittaaq ilaatigut akileraarutissat sinneri, tapiliussat, akitsuutit aammalu erniat, ukiumi akileraarusiiffimmi imaluunniit tulliani siumoortumik akileraarutaagallartunut ilanngullugit akileqquneqarnissaannut maleruagassanik Naalakkersuisut aalajangersaasinnaapput. Tamatumuuna siumoortumik akileraarutit akileriigassaagaluit ernialersorneqartarnerannut taarsiullugu akileraarutaagallartunut ilanngullugit tapiliussat akileqquneqarsinnaanerit Naalakkersuisut aalajangersarsinnaavaat."

§ 24-imut

2. § 24, *imm. 4*, atorunnaarpoq.

Imm. 5-7 matuma kingorna *imm. 4-6-inngorput*.

3. § 24, *imm. 7*, kingorna *imm. 6-nngortumi* „*imm. 3-6-imut*" allanngortinneqassaaq uunga: „*imm. 3-5-imut*".

§ 40-imut

4. § 40, *imm. 9*, oqaasertalerneqassaaq imatut:

"*Imm. 9.* Akileraarutit *imm. 1-imiit 8-mut* taaneqartunut kiisalu taakkununga ernialiussat tapiliussallu akilerneqannginnerisigut annaasat Landskarsip kommunillu akornanni agguataarneqassapput. KANUKOKA tusarniaavigereerlugu annaasat agguataarneqarnissaat pillugu maleruagassanik Naalakkersuisut aalajangersaasinnaapput.

Siunnersuummut oqaaseqaatit

Oqaaseqaatit nalinginnaasut

2007-imut ataatsimoortumik tapiissutissat KANUKOKA-p Naalakkersuisullu akornanni isumaqatigiinniutigineqarneranni KANUKOKA-p piumasaaqateqarneratigut isumaqatigiissutigineqarsimavoq akileraarutit A-t, akileraarutissat sinnerinut il.il. annaasat maannamutut landskarsip kommunillu akornanni agguataarneqartassasut. Inatsisissatut siunnersuummi siunniunneqarpoq annaasat taakku taamaallaat landskarsimit nammanneqassasut, tassunga illuatungiliullugu kommuninut ataatsimoortumik tapiissutit 15 mio. kr.-inik ikilineqassallutik. Kommunit tungaanniit oqaatigineqarpoq annaasat taakku agguataarinikkut, agguataarisarnerup ingerlaannarnissaa pitsaanerpaasoq. Kommuninit kissaatigineqartup taassuma itigartinneqarnissaanut Naalakkersuisut tungavissarsisinnaasimangillat.

Akileraaruserinermik ingerlatsineq pillugu inatsisartut inatsisissaattut siunnersuutip akuersissutigineqarnerata malitsigisaanik nalunaarutissap suliarineqartup suliarineqarnerani paasineqarpoq siunnersuummi § 24, imm. 4-p § 13-imut nuunneqarnissaa pitsaanerpaassasoq, tamatumalu peqatigisaanik taassuma atuuffia akileraarutinut tamanut atuuttussanngorlugu annertusineqarnissaa. Tamatuma kingorna aalajangersakkakut periarfissaqalissaaq akileraarutit siumoortumik akileraarutaagallartunut ilanngullugit akileqquneqartarnissaasa nalunaarutikkut aalajangersaavigineqarsinnaanera. Tamatumuuna akileraarutinut akiitsut amerlassutsimikkut ikilisarneqassapput akileraarutinullu akiitsut akileqquneqartarnerat pillugu allaffissorneq killiliivigineqassalluni.

Aalajangersakkanut ataasiakkaanut oqaaseqaatit

Nr. 1-imut

Siunnersuutigineqarpoq akileraarutit ukiumi akileraarusiiffiusumi imaluunniit tulliani siumoortumik akileraarutaagallartunut ilanngullugit akileqquneqarnissaannut maleruagassanik aalajangersaanissamut Naalakkersuisut piginnaatinneqassasut. Aalajangersagaq, siusinnerusukkut suli atuutsinneqarsimanngitsoq, periarfissiivoq akileraartartut akileraarutissat sinnerinut il.il. assersuutigalugu 15.000 kr.-it tikillugit akiliisannginnissaasa nalunaarutikkut aalajangersarneqarnissaanut. Tassunga taarsiullugu akileraarutit taakku ukiumi akileraarusiiffiusumi imaluunniit tulliani siumoortumik akileraarutinut ilanngullugit akileqquneqartalissapput, tamannalu pisassaaq akileraartartunut ilanngaataatinneqartartup annikillisinneqarneratigut.

Periutsimik taassuminnga atuinikkut pisariaqarnera naapertorlugu akileraartartoq naammaginatunik aningaasanik atugassaqartitaasussaavoq, taamaalilluni akileraartartoq taassumalu inoqutai angerlarsimaffeqarsinnaallutillu inuussutissaqarsinnaassapput (inuup pisariaqartitsinera artukkernagu).

Maleruagassanik aalajangersaanikkut ilaatigut akilerutit assigiinngitsut sorliit qanoq tulleriiaarneqarlutik siumoortumik akileraarutaagallartunut ilanngullugit akileqquneqartassanersut aammalu ernialersuinerlut taarsiullugu tapiliussanik akileeqquisalernissaq Naalakkersuisut aalajangersaavigisinnaalissavaat.

Nr. 2-imut aamma nr. 3-imut.

Nr. 1-imi siunnersuutaasup kingunerisaanik § 24, imm. 4 atorunnaarpoq. Aamma allannguutip kingunerisaanik allannguuteqartitsinissaq § 24, imm. 7, imm. 6-inngortussamut pisariaqarpoq allannguuteqartinneqarnissaanik.

Nr. 4-imut.

Isertitanit akileraarutit pillugit annaasat landskarsip kommunillu akornanni agguataarneqartarnissaat siunnersuutigineqarpoq aammalu annaasat taakku agguataarneqartarnissaat pillugu KANUKOKA tusarniaavigereerlugu maleruagassanik erseqqinnerusunik aalajangersaanissamut Naalakkersuisut piginnaatinneqassasut siunnersuutigineqarluni.

Agguataarineq pissaaq akileraarutinit kommunit aamma landskarsip pissarsiassaasa annertussusaat aallaavigalugu.

Tusarniaanissamut pisussaaffeqarnerup kingunerissavaa, Naalakkersuisut suliassaqarfimmut aalajangersakkanik nalunaarusiulinnginneranni KANUKOKA pineqartunut oqaaseqaateqartarnissaa pisinnaanngussammat.